

01. 獨角牛

以早，有一个飼牛的人，伊有一隻獨角牛。這隻牛真特別，伊毋但頭殼頂干焦有一支角，而且伊閣會曉講話，所以誠得人疼（thiann）。主人逐工攏足用心照顧伊，為伊洗身軀、飼伊食草仔，若親像養飼家己的囡仔全款。

有一日，另外一位飼牛的人來庄裡，伊那覘庄頭那大聲喝：「我有一隻勇壯閣誠有氣力的牛，一擺會使拖一百台車。有啥人的牛敢恰我的牛比賽？假使若贏，我願意送伊一千兩金。」獨角牛聽了心內想講：「主人逐工攏足用心咧照顧我，我應該愛借這個機會，替伊贏這條錢，報答伊的恩情。」

繼落來，伊共當咧為伊洗身軀的主人問：「主人，你敢有聽著外口有人咧喝聲？你會使共他約一个時間來比賽，我一定會力頭盡出，替你贏一千兩金。」主人聽著，有夠歡喜，他對獨角牛誠有信心，隨揣外口彼咧飼牛的人，同齊約束比賽的時間。

比賽彼一日，飼牛的人恁獨角牛來比賽的所在，透早，逐家攏集倚（tsip-uá）過來，想欲知影結果啥款。獨角牛

予主人恁出來，逐家佇邊仔嗤嗤吡吡，主人隨對喙講：「這隻牛一出世，頭殼頂干焦有一支角。」本成真有信心的獨角牛，聽著誠艱苦，感覺真自卑、鬱卒，完全無心情比賽。就按呢，比賽真緊就結束，獨角牛輸矣，主人嘛了一千兩金。

主人氣怫怫問獨角牛講：「你平常時仔誠有氣力，講好欲贏這場比賽，是按怎今仔日表現遮爾糶？」獨角牛講：「我拄才今仔（tann-á）出來，你就佇眾人面頭前講我的不足，我一出世頭殼頂就干焦一支角，原底就真自卑，你閣佇遮爾仔濟人面頭前大聲講出來，予我閣較傷心。所以，頭拄仔比賽的時陣，我一點仔氣力攏無。失禮啦！主人，你敢會使佇眾人面前共我呵咾，莫提起我的不足，我一定會使替你贏一千兩金轉來。」

落尾，主人共彼个飼牛人閣再約一擺時間，毋但按呢，閣共獎金提高，攏總兩千兩金。比賽彼工，主人一開始就佇眾人面前大聲呵咾獨角牛。獨角牛的氣力攏隨信心轉來矣，連鞭仔就贏比賽，順利替主人贏兩千兩金。